


IS'ATSUCUNTI JU JOSUÉ



IS'ATSUCUNTI JU JOSUÉ

La historia de Josué
Tepehua de Huehuetla, Hgo.

LAS SAGRADAS ESCRITURAS PARA TODOS



LA LIGA BÍBLICA, A.C.
México, D.F.

“Las Sagradas Escrituras para todos”

Publicado por
LA LIGA BÍBLICA, A.C.
México, D.F.

La ilustración en la pasta y en las páginas 3-11 y 14 son propiedad de David C. Cook Foundation, usadas con el permiso correspondiente.

Primera edición
La historia de Josué
Tepehua de Huehuetla, Hgo.
95-063 México, D.F. 2.5C
© La Liga Bíblica, A.C. 1996

IS'ATSUCUNTI JU JOSUÉ

**Ju Josué alact'at'ac'ut'a ju laxak'aixcan Jordán ju
ist'a'israelitanin**

Josué 1-5

Pus ju Dios junilh ju Josué ni ca'alact'atacutlich ju xak'aixcan Jordán ju ist'a'israelitanin. Pus acsnich ju junilh acsni ixnitach ju Moisés. Chai anchach ju ca'alac'hí'alh ju laxalacat'un Canaán junta ix'alajk'elhtasunitach ju Dios ni ca'alacmakaxtakniya'.

Pus vachu' ix'alajk'elhtasunita ju Dios ix'alac'aklhtaijuca ixlhajaca ju lasat acsni catalhilasaya' ju lacat'un. Pus ixlhiyuchach alac'himapast'ac'anilhch ju Josué ni va tach catapastaclich ju ixlac'hamap'aksin ju Dios.

Chai ju Dios alacjunilh ni tasq'uini ni cataquiclaca'ik'o chux ju ixlac'hamap'aksin. Pus ni cataquiclaca'ik'o ju ixlac'hamap'aksin, ju Dios vatach ca'alac'aklhtaijuyach.

Pus ju astanch ju Josué alacjunilhch ni catalak'asitavilhch ixtacutca ju laxak'aixcan Jordán. Chai alacmapast'ac'ani ju jok'atni ju tuchi ixtak'elhtasuta ni cata'a'aklhtaijununa' ixlhajaca chux ju xalacat'un Canaán. Pus ju yu'unch lapanacni quilhmact'ui apaitat ixtajunita ju ix'apapanatni ju Israel. Chai ju yu'unch lapanacni anch ixtasq'uinta ixtolaca junta ixtavilanalh ixchux'an ju ist'a'israelitanin acsni jantuca' ixtat'ac'ut'a ju xak'aixcan Jordán.

Chai amalakachalhch pumat'ui jok'atni ju cata'alhch tank'ajlaks'tinin ju xalacat'un Canaán. Pus ju acsnich ta'alhch ju ixt'iyun'an ju xalak'achak'an Jericó. Chai ju acsni atats'isni anch talak'acujli ju la'ixchaka' ju pumatam alactu'unu chako'ulh ju juncan Rahab.

Para ju xa'ucxtin Jericó k'esmatlh ni ixtavilanalh ju atank'ajlaks'tinin israelitanin ju la'ixchaka' ju Rahab. Chai

alacmalakachalhch ju ali'in ixlapanacni ni cata'alhch sq'uinin ju chako'ulh ni ca'alacmak'axtaknilhch ju atank'ajlakts'inin.

Para ju Rahab ixlhi'ap'ulhnanch ixc'atsata ni catalakcha'ana' ju ixlapanacni ju ucxtin. Chai ju acsnich alacmatank'anulhch ju atank'ajlakts'inin ju la'ix'ucxni ixchaka' junta na lhu ixlacmamatacha ju lino juncan ju ixlhinavican ju lajk'oxi pumpu'.


Pus ju ixlapanacni ju ucxtin talakcha'alhch ixlhasacmininca ju atank'ajlakts'inin ju la'ixchaka' ju Rahab. Chai ju yuchi alacjunilhch ni ixtataxtutach ju yu'unch lapanacni ju xalak'achak'an Jericó. Chai ju yu'unch lanach va ts'alhti tataima ix'a'akch'ak'ok'axmaca.

Pus ju acsnich ju Rahab alhch alact'achivini' ju atank'ajlakts'inin. Chai alacjunilhch ni ixc'atsaich ni ca'alacmak'axtaknik'oya' ju Dios ju israelitanin ju xalacat'un Canaán. Chai alacjunilhch ni vachuch chunch ju cata'aklhtaiju tach ju ix'alac'aklhtaijutach ju yuchi. Chai alacjunilhch ni jantuch ca'alact'amaknicalh ju ixlapanacni acsni ca'alact'alasacana' ju amachak'an Jericó. Pus ju atank'ajlakts'inin israelitanin k'oxich talhiula ju chunch chivinti ni ix'alacmak'elhtaxtucantach ju yu'unch.

Pus ju ixchaka' ju Rahab anch ixya junta ix'ulacanta ju k'ex ju ixpulak'achak'axnucanta ju lak'achak'an Jericó. Pus ju acsnich ju yuchi puxcaulich lakatam ju na lhman lasu. Chai yuchach ju alacpuch'ik'elhtaju ju atank'ajlakts'inin ju lhila'ixventana ju la'ixlhipulacan ju k'ex. Pus alacjunilh ni cata'alhch tatank'anunin lakat'utu avilhchan ju lacaq'uivin acsni jantuca' ta'anchokoi ju la'ixlacchaka'an junta ixtavilananchalhch ju ist'a'israelitanin.

Pus ju yu'unch tajunilhch ju Rahab ni catantuch'imuc'alhch mak'atam slapulh lasu ju la'ixventana. Chai vachuch ca'alacmak'aixtojk'o chux ju ixlhi'alak'avin junita chai ju ixpai chai ixnati ju la'ixchaka'.

Pus ni ch'imuc'atach ju lacslapulh lasu ju la'ixventana, ju chunch catac'atsayach ju israelitanin tasmalh ju ixchaka' ju chako'ulh. Pus ju chunch ju israelitanin



*Alacpumak'elhtajucan ju
lacaventana*

jantuch catitamakni ju
tatanumanalh ju anch
lacachaka' ni tac'atsaich
tis ixchakach. Pus ju
Rahab naulich ni
chunchach ju canaviya'.

Pus acsni
ixtaquitatank'anutach ju
lakat'utu avilhchan ju
atank'ajlaks'tinin
ta'anchokolhch junta
ixvilhcha ju Josué chai ju
ali'in ist'a'israelitanin. Pus
ju atank'ajlaks'tinin
talacnaulich tas ixnavitach
ju Dios ju xalapanacni
Canaán ni na
catalactalhanalhch.

Pus ju acsnich ju Dios
junilhch ju Josué ni
ca'alacmalhi'anilhch ju
ixpalijni'an ju
ist'a'israelitanin ju salaka
p'aklat junta ixchin ju
Dios. Chai catach'ixlhi'alh
la'ixquilhtu' ju k'aixcan
Jordán.

Pus ju Josué chunchach
ju xanavi. Chai acsni
tavananch xatatach'anjui
ju palijni ju lacxcan lana
talhvakpitsilh ju k'aixcan.
Pus ju xcan ju ixtajuminta
va lakputamch ju
tak'aixtoktavi. Pus ju acsni
xa'avilhchan ju c'ata na
lhu ixjunita ju k'aixcan.

Pus ju palijni ju
ixtach'ixlhi'anta ju salaka



Tat'ac'ut'a junta puxixa ju k'aixcan

p'aklat tatayalhch ju la'ixlacaitat ju k'aixcan junta ixmaxixita ju xcan ju Dios. Anch ju tataya tus ni tatapasak'olhch ju lapanacni junta ix'axixninta ju lacat'un.

Chai ju Josué vachu' alacsacxtulh pumacaut'ui jok'atni, pumatamin ju quilhactamin xa'apapanatni ju ist'a'israelitanin. Chai ju yu'unch lapanacni catasaclich lakatamin lajk'ai chiux ju la'ixlacaitat ju k'aixcan. Chai anchach ju talacsac'h junta ixtalacyanalh ju palijni. Pus ju lacchiux anchach ju catamak'aixtokmaya' junta catalacacuja' ju anu' atats'isni.

Pus ju Josué chunchach ju alacmanavini ni catapastaclich ju ist'a'israelitanin ixlacata ju k'ai lhamak'an ixt'ajun navini ju Dios ju acsni avilhchan.

Pus ju acsnich ju palijni ju ixtach'ixlhi'antach ju salaka p'aklat tatacutlich ju k'aixcan. Pus vayuch ni tatacutk'o ju k'aixcan lanach alhtananchokolh ju xcan tach ju ixjunitach ju ixlhi'ap'ulhnan.

Pus ju ts'alan ju ixtatsucuta junta apakniu acsni ixtalac'ucxunt'ajun ju t'up'uxam c'ata na lajk'ayalapanacnich ixtajunita. Pus ju yu'unch jantuch ix'alacch'uc'unicanta ju ix'axt'ak'a'an ju ixlhilakatsajin avilhchan ixputsucu'an. Pus ju Dios chunchach ju ixjunita ju Abraham ni ca'alacnavi. Pus ixlhiyuchi ju Dios junilhch ju Josué ni ca'alacch'uc'unilh lacts'unin ju ixlac'axt'ak'a'an ju jok'atni.

Pus ju acsni avilhchan yuchi ju xap'ulhnan malhquiyu' ju c'ata ixjunita ixpupastajcan ju anu' atats'isni acsni tatak'alhtaxtulh la'ix'aninti'an ju xalajk'ajin ts'alan. Alilh ju c'atan ju xalakacaut'at'i avilhchan ju acs malhquiyu' chai ju acsni ta'ulh ju xalhi'ut ju anu' lacat'un Canaán. Para ju acsnich ju xatrigoch Canaán ju talhinavi ju xk'apavat jantuch talhiyaulh ju xask'ajni squitit. Tam semana ju ta'ulh acsni tapasalhch ju c'atan.

Chai acsni tatsuculh unin ju xalhi'ut ju anu' lacat'un pus tamactalh ixpatajuca ju maná ju ixta'ui ni jantuch ixtamaktasqu'ui.

Ju israelitanin tatanu ju Jericó

Josué 6

Pus ju amachak'an lak'achak'an Jericó lana k'ox ixtalactalhoni ju israelitanin. Pus lanach va lakputam ju ixtalacvilanalh ju ixpulacnich ju lak'achak'an. Pus lanach jantu xamati' ixtaxtui ju ca'alh alacatam nin yuchi ju catanuchokolh ju lak'achak'an. Chai ju xalacmalhtich ju ixpulak'achak'axnucanta ju lak'achak'an lanach k'ox ixmalacchocanta.

Pus ju acsnich ju Dios junilhch ju Josué tas ca'alacput'alalhajayach ju amachak'an Jericó. Pus chinich junilh:

—Pus alhip'ink'och chux ju mintaropajni chai ali'inch palijni ju catach'ixlhi'alh ju salaka quimp'aklat. Chai junilh ni catatalak'axvililhch ju ixtalakachoko ju Jericó paktamin ju lakatamin avilhchan. Pus lakachaxan avilhchan ju chunch

catalac'ucxuntsucuya'. Chai jantu xamati' cachivina' acsni
tat'ajun talak'axvilinin ju lak'achak'an. Chai paktujun
at'alak'axviliya'it'it ju ixlhilakatuju avilhchan.



Tasunui ju isk'olhni'an

'Chai ju vayuchach at'alak'axviliya'it'it ju Jericó ju palijni catasunach ju isk'olhni'an ju lhinavicanta ix'ak'alak'ot ju calhnilu. Chai acsni catak'esmat'ach ju taropajni ju sk'olit, va aktamch ni catalact'asaya'. Pus acsni catalact'asayach lanach camuluntatist'aya' ju ixpulak'achak'axnucan ju Jericó.

Chai ju Dios vachu' chani alacjunilh:

—Ju quit'in ac'alacmamak'alhk'ajniya' chux ju tuchi alin ju lak'achak'an. Pus alacmaknik'oya'it'itch chux ju lapanacni chai chux ju lac'atapacxat ju tat'ajun ju anch. Para chux ju lhinavicanta ju tsasnat amanuk'oya'it'it lalalonachaka' junta icchin. Chai ju lak'achak'an lana ap'uxavamakoya'it'it. Pus jantu lai tu'u' catitatamoconin ju tuchi alin ju xalak'achak'an Jericó.

Pus ju Josué alacjunk'o chux ju lapanacni ju tuchi ixjunitach ju Dios. Chai alacjunilh ni jantu xamati' catitamaputaxtuni ju amachak'an Jericó. Pus va yuchach ju Rahab chai ju ixlhi'alak'avinch chai ixpai, ixnatich ju catamaputaxtuniya'. Pus ju yuchi chako'ulh va ix'alac'aklhtaijuta ju atank'ajlakts'inin ju ixtaquilak'amispatach ju lak'achak'an.

Pus ju israelitanin chunchach ju sok tanavi tach ju ix'alacjuncantach. Pus va paktamch ju ixtatalak'axvili ju ixtalakachoko ju Jericó ju tam avilhchan. Chai lakachaxanch avilhchan ju chunch tanavi. Para ju ixlhilakatujujunch avilhchan paktujunch ju tatalak'axvili. Pus ju acsnich ju palijni tasunulhch ju isk'olhni'an chai ju taropajni va aktamch ni talact'asalh. Chai ju ixpulak'achak'axnucan ju Jericó lanach muluntatist'alh.

Pus ju xataropajni ju israelitanin lanach sok'o tatanu ju Jericó. Pus talacmaknik'olhch ju lapanacni chai chux ju lac'atapacxat ju ix'alín ju anch. Pus va yuchach ju jantuch xatamakni ju Rahab chai ju ixlhi'alak'avinch, ixpaich chai ixnatich.

Pus ju ixt'iyunch'an atank'ajlakts'inin ju ixtaquilata taqui'ilhch ju Rahab. Chai talact'alhimilhch ju ixlhi'alak'avin ju la'ixlaclonachaka'an ju israelitanin. Pus ju acsnich ju israelitanin tapuxavamalhch ju Jericó.



*Mulun tatist'alh ju ixpulak'achak'axnucan ju Jericó
acsni lact'asacalh*

**Ju israelitanin tanavi talakmask'atin ixtanuca
ju xalak'achak'an Hai**

Josué 7-8

Pus ju pumatam israelita malacla ju ixlhamap'aksin ju Dios. Pus ju Dios ix'alacjunita ni jantu tu'u' catitamak'a ju xataxtokni ju ix'alin ju xalak'achak'an Jericó.

Pus ju lapanac ju ixjuncan Acán lakts'ilh ju oro chai ju alich tumin ju si plata chai lakatamch mak'atanut ju na laklhu ixtapalhni. Pus acsni lakts'ilhch ju ani lactaxtokni lanach k'ox k'achanilh ixlacmak'aca.

Pus Acán lachhi'alhch ju lactaxtokni chai lacmacnuchalhch junta ixyajutach ju ixlonachaka'. Para lana jantu xamati' ixlakts'inta ju tuchi ixnavita.



T'ajun macnunu' ju ix'ak'alhajunti ju Acán

Pus ni astanch va ju xataropajni israelitanin ta'alhch t'alasanin ju xalapanacni ju lak'achak'an Hai. Pus ni jantuch na va k'ai ixjunita ju lak'achak'an, jantuch

tamalakachak'o ju taropajni. Pus tatanulhch ju xataropajni ju israelitanin ixt'alasaca ju xataropajni ju Hai. Chai ni xatalasaich, ta'alhajanalh ju xalapanacni Hai.

Pus ni chunch ju xatatapasaich ju israelitanin lanach k'ox tatalhanalh. Pus ju acsnich ju Josué t'achivinilhch ju Dios ixlacata ju chunch lhamak'an.

Pus ju Dios junilh ju Josué ni jantuch ixta'alhajananta ju israelitanin ju lalacasat ni va jantu ixtaquiclaca'ita ju tuchi ix'alacjunita. Pus ju yuchi ix'alacjunita ni jantu tu'u' catitalhi'alh ju xataxtokni ju ix'alín ju Jericó.

Pus ju alakatamch avilhchan vats'isin talhilasljajlich ixlacata ju lhamak'an. Chai ju acsni talacts'ok'ulalhch ju ixlactapaka'ut'an ju lalacact'icst'i alhiqui. Chai talacmujulhch ju lacatu'u' c'a'ulh. Chai tasqu'inilh ju Dios ni ca'alacmasunilhch tis chavaich ju ix'alactu'ununtach. Pus ni catamajcutuchokoyach ju lakatam tapaka'ut, pus chunch ju capumalacasuyach ju Dios.

Pus ju p'ulhnan xatalacts'ok'ulai ju ixlactapaka'ut'an ju ixquilhmajcaut'ui'an ju ists'alan ju Israel. Pus ju acsnich ju Dios malacasulhch ni yuchi ju ixpapanti ju Judá ju ix'alactu'ununta. Chai ju astanch xamalacasui chunch xatasui tach ju ixtavilanalhch ju laca'ak'ataminch chaka'. Pus ju va yuchach xamalacasui yuchach ju Acán.

Pus ju Josué sacmilhch tijuch ju ixnavita. Chai ju Acán nonk'olhch chux ju tuchi ixnavitach.

Pus ju acsnich ju israelitanin tat'alhi'alhch ju Acán chux ju ixlactaxtokni ju lak'amakspan junta ixya ju laclonachaka'. Chai tat'alhi'ank'olhch chux ju lactaxtokni ju ixlacmatank'anutach. Pus anchach ju talacat'alhmamaknicha.

Pus ju Dios alacjunilhch ni catat'alasalhch ju Hai para quilhmact'uich catatalakpitsilh ju xataropajni. Pus ju quilhmactam lhitalacxtulhch ni va talhana'ats'alalh. Pus ju acsnich ju xalapanacni Hai alac'acch'ak'ok'axmalhch. Pus ju acsnich tataxtulh ju quilhmactam ju ixtatank'anunun chai tatanulhch ju Hai. Pus ju yu'unch lapanacni vanin ju lak'achak'an ju ixtatank'anunun. Chai ju israelitanin tapuxavamalhch ju Hai.

Pus ju acsnich ju xataropajnich ju israelitanin ju ixtalhilacxtununch ni va ixta'ats'alatach,



Tapuxavamai ju lak'achak'an Hai

tatalak'asp'itchokolhch. Chai ni tatalak'asp'ittayalhch tat'alasalhch ju ixta'ataimananta ju amachak'an Hai chai talacmaknik'olhch ixchux'an.

Pus ju acsni ju Dios alacjunilh ni laich catalacchi'alh ju lac'atapacxat. Pus laich catalacchi'alh ju alich ixlactaxtokni'an ju talactai'inilh ju amachak'anch Hai.

Pus ju astanch ju Josué navilhch lakatam k'ai mixa junta laxxavanican ju ixlhak'ailakts'inti ju Dios. Chai ju yuchi si chiux lhinavi. Chai ju yuchi anch ju navichalhch ju laxalactalhpa ju Ebal. Pus anchach ju talacmaknilh ju lac'atapacxat ju israelitanin. Pus ju yuchi talhimalacxtulhch tach ju xalhak'ailakts'inti ju laxxavak'ocan chai tach ju xalhak'ailakt'intich ju lai lat'a'ucan. Chai vachu' ts'ok'ula ju lalacacchiux ju lachhamap'aksin ju ixtaknita ju Dios ju Moisés.

Chai alacmak'esmat'alhch tach chun ju ist'a'israelitanin ju ixlac'hamap'aksin ju Dios. Chai lana k'ox p'as chivinilh ni laich catalajk'esmatk'o ixchux'an. Pus alacmak'esmat'alhch junta najun ju Dios ni ca'anaviniya' ju k'ox tach chun ju cataquic'lacla'ilhch ju ixlac'hamap'aksin.

Vachu' alacmak'esmat'alhch junta najun ju Dios ni ca'alacmoconiya' ni macxcai catatapasalh ju jantuch cataquic'lacla'iya'. Pus ju Josué chunchach ju alacmanavini ju ist'a'israelitanin ni chunchach ju ixjunita ju Moisés acsni tuca' ixni.

**Ju xalapanacni gabaón alac'okxchok'oi
ju israelitanin**

Josué 9

Pus ju lak'achak'an juncan Gabaón anch ixma ju laxalacat'un Canaán. Pus ju xalapanacni ju anch lak'achak'an lana k'ox ixtalactalhoni ju israelitanin. Pus ju yu'unch ixtak'esmattach tas ix'alacpu'aklhtaijutach ju Dios ix'at'alalhajaca ju na lhu xalak'achak'anixni. Chai ju israelitanin na lhuch lapanacni ju ixtalacmaknita ju anch ixtavilanalh.

Pus ju yu'unch jantu ixtalacasq'uin ni vana ca'alacmaknicalh tach ju ix'alacnavicantach ju ali'in. Pus ixlhiyuchach talac'hi'okxchok'olhch ju israelitanin.

Pus ju acsnich ju gabaonitanin talack'ilhch ju na lajk'at'ilhch ju ixlacpumpu'an. Chai talhi'alhch ju na lakp'asnich ixjunita ju ixk'apavati'an chai na ixlacjokstach chai ta'alhch lakt'sinin ju israelitanin. Chai talacnaulich ni xalapanacni ju na makat amachak'an xalak'achak'an ju ixtamintacha mas vanin ju ixtavilanalh. Pus tajunilhch ju Josué ni catat'anavilhch lakatam atak'oxinti.

Pus ju israelitanin lana jantu xatapast'ac'a isq'uinica ju Dios ix'aklhtaijunti ixlacata ju ani lhamak'an. Pus tat'anavilhch ju atak'oxinti ju gabaonitanin ixk'elhtasuca ni jantuch catitalacmakni.

Pus tus ixlhilakat'utuch avilhchan ju tapuc'atsa ju israelitanin ni amachak'an Canaán ixtajunita ju gabaonitanin. Para ixtak'elhtasunitach ni jantuch catitalacmakni. Pus ixlhiyuchach jantuch lai xatalaclhimakni.

Esta ilustración
no está disponible.

Ju gabaonitanin talacsaknani ju israelitanin

Pus tus acsnich avilhchan ju israelitanin ixlapanacnich'an talacnavi ju gabaonitanin. Pus ju acsnich ixlacsaknach'an talacnavi ju israelitanin. Pus ju gabaonitanin ixta'anch lacsaknin chai ixtalac'inich ju ixcan'an ju israelitanin.

**Ju israelitanin tat'alasai ali' lact'icst'i lak'achak'anixni
chai lajk'ai lak'achak'anixni**

Josué 10-12

Pus ju xa'ucxtin ju lak'achak'an Jerusalén k'esmatlh ni va ch'anxtamch tat'ajunita ju ixlasiat'an ju xalapanacni Gabaón ju israelitanin. Pus ju yuchi lana jantu k'ox lhiula ni jantuch cati'alacmaknicalh ju gabaonitanin.

Pus ju acsnich ju xa'ucxtin Jerusalén alacmak'aixtoklich apumat'at'i xalac'ucxtinin ju lak'achak'anixni ju va ch'anxtamch ixtat'ajunita. Pus ju yu'unch talacmak'aixtoklich ju ixlactaropajni'an chai ta'alhch alact'alatanin ju xalapanacni Gabaón.


Pus ju acsnich ju gabaonitanin tasq'uinilhch a'aklhataijunti ju israelitanin ni va ch'anxtamch ixtat'ajunita. Pus ju Dios junilh ju Josué ni yuchi ju ca'alac'aklhataijuya' ju ixlhajaca ju lasat. Pus chunchach ju alacpumak'aixtoklich ju ixtaropajni ju Josué chai ta'alhch lasanin.

Pus ni Dios ju alac'aklhtaiju ju israelitanin, ta'alhajanalhch ju lacalaset chai tats'ank'alhch ju ixtaropajni ju pumaquis ucxtinin. Chai ju jantuch alacmaknicalh alacxcavats'alacalhch. Pus ju ixtaropajni ju israelitanin talac'akch'ak'ok'axmalhch ju ix'alact'alaxcai'an chai talacmaknilhch ju ali'in junta talactaimayocha.

Chai ju Dios vachu' alacpu'aklhtaiju ni macamilh ju lajk'ai chaj'it. Pus ju yuchi chaj'it lana k'ox lhu lapanac makni, palai jantu lhu ju xatamakni ju israelitanin.

Pus ju acsni avilhchan ju Dios vachu' navi lakatam k'ai lhamak'an. Pus ju Josué sq'uinih ju Dios ni palai lhman canavi ju avilhchan ni laich catailhi'alh ju ixlacaca. Pus ju acsnich ju Dios na panicnich ju jantuch moconilh ni ca'alhtanalh ju avilhchan.

Pus ju israelitanin talhajalh ju lasat ju ix'alact'alaxcai'an ixtajunita chai tats'ank'a ju xataropajni Jerusalén. Chai ju acsnich ta'alhch ju israelitanin ju alich la'ixlaclak'achak'anixni'an ju ixpumaquis'an ucxtinin. Chai ta'alhch ju alich lajk'ai chai lact'icst'i lak'achak'anixni.



*Na panicni ju jantu alhtanalh ju avilhchan acsni ixt'ajun lasana' ju
Josué*

Pus chux ju lak'achak'anixni junta talact'alasa ta'alhajanank'o ju israelitanin. Chai vachu' ju israelitanin talact'amaknik'o chux ju pumaquis ucxtinin ju xalapanacni ju lak'achak'anixni junta ixtalhinajun ju yu'unch ucxtinin.

Pus ju xa'ucxtin ju lak'achak'an ju juncan Hazor c'atsa ju tuchi ixtapasata. Chai ju acsnich na pumalhuch ucxtinin ju alacmak'aixtoklh ju yuchi. Pus chux ju yu'unch tamak'aixtoklich ju ixtaropajni'an, ixlajcabballojni'an chai ju ixlacpalhtanch'an ju tapulasai. Chai ju yu'unch ta'alhch alact'alanin ju israelitanin.

Para ju Dios junilh ju Josué ni jantu ca'alactalhonilh ju yu'unch lapanacni. Chai junilh ni cata'alhajanana' ju israelitanin ju alakatam avilhchan. Pus ju Josué alacchi'alhch ju ixtaropajni chai lana va sek talakchinch'a ju ix'alact'alaxcai'an.

Pus ju israelitanin ta'alhajanalhch chai talacmaknik'olhch chai talaclakxava'ulanilhch ju ixpalhtan'an ju tapulasai. Chai ju ixlajcabballojni'an va talacch'anch'uc'unilhch ju ixlacch'ansivic'an.

Chai ju astanch alact'a'alhch ju Josué ju ixlactaropajni ju Hazor chai talhajapa ju israelitanin ju anch xalapanacni. Pus talacmaknik'o chux ju anch xalapanacni chai tapuxavama ju lak'achak'an.

Chai ju astanch ju israelitanin ta'alhch lact'ilhinin ju lajk'ai chai ju lact'icst'i lak'achak'anixni. Chai talacmaknik'o chux ju xalapanacni ju anch lak'achak'anixni. Para ju

Esta ilustración
no está disponible.

Lakxava'ulacan ju lacpalhtan ju tapulasai

lac'atapacxat chai ju lactaxtoknich ix'anuch'an tava ju israelitanin.

Pus chunchach ju tapu'alhajanalhch ju Josué chai ju ixtaropajnich. Pus chunch ju tapuch'apak'olhch ju Canaán mas na lhuch ixjunita ju lak'achak'anixni ju anch lacat'un.

**Ju Josué alaclhvakxtakni ju quilhmajcaut'ui xa'apapanatni
ju israelitanin ju lacat'un**

Josué 13-22

Pus ju israelitanin na lakalhu c'ata ju taputai'ik'o ju Canaán acsni ix'alacp'ulhnita chai ni xa'ucxtin ixjunita ju Josué. Chai ni na lakalhuch c'ata ju ixtalac'ucxunt'ajun ju Josué na papach ixjunita.

Pus ju acsnich jantuca' ixtatai'ik'ojui ju xalacat'un ju Canaán. Para ju Dios junilh ni mas chunchaca' para laich ca'alaclhvakpitsinilhch ju quilhmacnajatsi apaitat ju jantuca' ixta'amaklhtayanan ju ixlacat'un'an ju llich'ato'anta ju k'ai xcan Jordán.

Pus ju Eleazar, xak'ai pali ixjunita. Pus ju acsnich ju yuchi chai ju palaich na lacpapanin ixtajunita ju quilhmactamin ju israelitanin yu'unch ju xata'aklhtaijui ju Josué ixlak'oxica ju lhilaslatat ixlacata ju lacat'un.

Pus yu'unchach ju xatat'achivininch ju Dios ni yuchach ju ca'alac'aklhtaiju ixlhvakpitsica ju lacat'un. Chai ju astanch talacts'ok'ulalhch ju ixlactapaka'ut'an ju lalacact'icst'i alhiqui ju quilhmactamin. Chai ju acsni talacmujulhch ju lacatu'u' c'a'ulh. Chai ju astanch lakataminch xatamajcutuchokoi. Pus chunchach ju xatalapulhvakxtaknik'ojuich ju ixlaclacat'un'an ju quilhmactamin.

Pus ju acsni ixt'ajunca' vachu' ju Caleb. Chai ju yuchi lapanac pumatam ixlhiyu'unch ixjunita ju p'ulhnanch ixtaquitank'ajlaks'intat ju Canaán ju ixlhipumacaut'ui'an. Pus ju yuchi na ix'alacchimapa'aksi ju ist'a'israelitanin ni p'as catalhilaksi ju Dios. Chai ix'alacjuni ni ca'alacmuctaxtuniya' ju Dios ju tuchi ix'alajk'elhtasunita. Chai catat'alalhajaya' ju amachak'an Canaán. Pus ju Moisés ixk'elhtasunita ju Caleb ni camak'axtakniya' junta ixquitank'ajlaks'intach.

Pus ju acsnich ju Caleb sq'uinilhch ju Josué ni caxtaknilhch ju yuchi lacat'un. Pus ju Josué na k'ox lhiula chai xtaknilh ju lak'achak'an Hebrón. Pus ju acsnich ju Caleb alhch alact'alasana' ju xalapanacni ju anch lak'achak'an. Chai alactai'inilhch ju anch lacat'un.

Pus ju Caleb ixpapanti ixjunita ju Judá. Chai ixlhiyuchi ixlacat'un ju yuchi anch ixch'ek'extaknicantach ju la'ixlacat'un'an ju ix'apapanatni ju Judá. Chai ju ani lacat'un anch ixlhima ju ixlhisur ju Canaán. Pus ju yuchi lacat'un anch ixmalhch ju xalak'achak'an Jerusalén. Para ju ix'apapanatni ju Judá jantu lai xatat'alalhajai ju jebuseonin ju ixtavilanalh ju Jerusalén. Pus ixlhiyuchach talaclhit'atavilhch junta ixtavilanalh ju yu'unch.

Chai ju ixlhinorte ju Canaán yu'unch tatamoconilhch ju ix'apapanatni ju Efraín. Chai vachu' anch tatavi ju ix'apapanatni ju Manasés ju matica' ixlacat'un'an ixtajunita. Pus ju ani quilhmact'ui xa'apapanatni ixtapast'ac'a ni jantu alhek'ai ixjunita ju ixlacat'un'an ju yu'unch. Para ju Josué alacjunilh ni laich catach'apak'o ju laclacatayantinic'a ni catatamacxtulhch ju anch ixtavilanalh lapanacni.

Chai ju israelitanin tayaulich ju lonachaka' junta ixtalak'ayai ju Dios ju xalak'achak'an Silo. Chai ju lacat'unch ju ixtitamacajunta va ch'anxtamch talhilacchivinih ni catalaclhvakpitsiya' ju quilhmactujun xa'apapanatni ju ixtitac'acxaca'.

Pus ju acsnich talacmalakachalhch ju ali'in lapanacni ni cata'alhch laclhvakpitsinin ju ixtitac'acxa ju quilhmactujun ju ixtixajtacha ju lacat'un. Pus ju yu'unch va talhilaslajlich ixlhvakpitsica ju lacat'un ju quilhmactujun xa'apapanatni ju israelitanin.

Chai tasq'uinilh ju ix'aklhtaijunti ju Dios ixlacata ju ani llich'alhcat. Pus ju astanch talacts'ok'ulalhch ju ixlactapaka'ut'an ju quilhmactamin ju lalact'icst'i alhiqui. Chai talacmujulhch ju lacatu'u' c'a'ulh. Chai ju astanch talacmajcutuchokolh lakatamin. Pus chunchach ju tapulalhvakpitsinilhch ju ixtitamacajunta ju lacat'un.

Pus ju ix'apapanatni ju Simeón chai ju Benjamín anch ta'amaklhtayanalhch ju ixlacat'un'an vanin junta ixt'alach'apata ixlacat'un ju Judá. Chai ju ix'apapanatni ju

Esta ilustración
no está
disponible.

Yuchi ju lacat'unch ju alac'hvakpitsinicalh ju israelitanin

Zabulón, Isacar, Aser, Neftalí chai ju Dan anch xata'amaklhayanen ju palaich lhits'ast'ai ju Canaán.

Chai ju astanch alacxtaknicalhch t'up'uxamtsajin lak'achak'anixni ju palijni chai ju levitanin. Pus ju yu'unch jantu tu'u' lacat'un ixta'amaklhayananta.

Chai tasacxtulh lakachaxan lak'achak'anixni junta laich catatsuculh ju va okspala ta'amakninin. Pus anchach ju laich ca'alh tolhna' ju va ca'okspala makni ju tam ixt'alapanac. Pus ju chunch jantuch lai catitamakni ju ixlhi'alak'avin ju lijunto.

Pus chunch ju tapulalhvakpitsinik'olhch ju lacat'un ju israelitanin. Chai ju acsnich ju Josué alact'achivinchokolhch ju ix'apapanatni ju Rubén, Gad chai ju apaitatich ix'apapanatni ju Manasés. Pus ju yu'unch ixtak'elhtasuta ni cata'aklhataijuya' ju ali'in israelitanin ixlhajak'oca ju Canaán. Pus ni ixtamuctaxtutach laich cata'anchokolh ju la'ixlalat'un'an ju xalak'antacutni ju xak'aixcan Jordán.

Pus ju Josué alacmapast'ac'ani ni cataquiclaça'i chux ju ixlacclamap'aksin ju Dios. Chai tasquini ni catamapaini chai catanavinilh ju ixk'achat ixlhichux ju ix'alhunut'an.


**Ju Josué axtakni ju vayuchach ix'atap'aksinti
ju israelitanin**

Josué 23-24

Pus acsni na papach ixjunita ju Josué alact'asanik'olhch ixchux'an ju xalac'ucxtinin ju ist'a'israelitanin. Chai ju acsnich alacxtaknilhch ju vayuchach ix'amap'aksinti ni jantuch catalacamacaulh ju Dios. Pus chanich alacjunilh:

—Pus ju uxitnan lakt'sint'itch tas xatapu'aklhataijuyanch ju Dios ixlhajaca ju ani lacat'un. Chai ju yuchi lacat'un na k'ox junita junta laich at'ola'it'it. Pus ixlhiyuchach vatach anavinik'ot'itch ju tuchi najun ju la'ixlacclamap'aksin ju Dios ju quintaxtaknitan ju Moisés.

Chai jantu mi'amigojni'an anavit'it ju cananeonin ju titavilanalhca' ju anch lacat'un. Pus jantu xamati' at'it'at'amak'axt'okt'it ju ixlhiyu'unch. Chai jantu alak'ayaya'it'it ju jantuch istavasalanti dios ju ixdios'an ju yu'unch.



Alhiqui junta lacts'ok'ulacanta ju ixlaclhamap'aksin ju Dios

Pus ni anaviya'it'it tu'u' ju chunch taxtokni, ju Dios jantu catita'aklhtaijun ix'alactamacxtuca ju yu'unch lapanacni. Pus ju yuchi ca'alacmoconiyach ni catatamacaulich ju anch. Chai ju acsnich yu'unch na catasast'uc'anch ju uxitnan.

Pus lak'ailakts'iuch caxtakniu ju Dios. Slivasalh lhu ju k'ox ju xaquintanaviniyan tus chavai. Para ni jantuch camuctaxtuniyau ju tuchi lhit'atak'oxitau ju yuchi catalhk'amna'. Chai ni calak'ayau ju jantuch istavasalanti dios aquintatai'inichokoyan ju ani lacat'un ju quintaxtaknitanch.

Pus ju Josué alacmapast'ac'anik'o chux ju tuchi k'ox ix'alacnavinita ju Dios ju mak'aniya ixlacpaich'an. Pus tai'ula ix'alacmapast'ac'anica tus yuchi ju Abraham acsni malakacha ju Dios. Chai vachu' alacmapast'ac'ani ju tuchi ix'alacnavinita ju Dios ju yu'unch acsni ix'alacmaxtuta ju Egipto.

Pus alactapaininilh ni jantu va k'aya catalak'aya ju jantuch istavasalanti Dios. Chai alacjunilh ni va yuchach ju catalak'aya ju istavasalantich Dios. Pus ju lapanacni tak'elhtasulhch ixlak'ayaca va yuchi ju istavasalantich Dios.

Pus ju acsnich ju Josué alacmalakachachokolh ju pumatamin junta ixlacyachalhch ju ixlaclonachaka'an ju

quilhmact'ui apaitat ju ix'apapanatni ju Israel. Chai ju yu'unch anch ixtatamocontacha ju ixlhilak'antacutni ju xak'aixcan juncan Jordán. Chai ju lacat'un ix'anuch'an ixtajunita ju israelitanin.

Pus ju acsnich tamapaxanilhch ju ixtapaka'ut ju anu' lacat'un. Chai jantuch vana Canaán ixjuncan. Para Israelch junicalh ni ix'apapanatnich ixtajunita ju yuchi.

Pus ni jantuch mak'an va, nilhch ju Josué. Chai anchach ju tamacnulhch junta la'ixlacat'unch ixjunita. Pus ju ixlacat'un anch ixlhima ju laxalacat'un Israel junta ixlhima ju ixlacat'un'an ju ix'apapanatni ju Efraín. Pus ju Josué vachu' ixhipapanti ixjunita ju Efraín.

Pus acsni ixt'ajunca' ju Josué, ju israelitanin ixtat'ajun lak'ayanin ju Dios. Chai tatailhi'alh ixlak'ayaca ni ixtat'ajunca' ju xalac'ucxtinin ju ixtalakts'intach tas ix'alacpumak'axtaknitach ju Dios ju yuchi lacat'un.

Chai ju acsnich c'ata talacmacnulhch ju israelitanin ju ixlac'alacutni ju José ju mak'aniya ixpaich'an ixjunita. Pus ju José chunch ju ix'alacjunitach ju ix'alak'avin. Chai ju yuchi alucutni tus Egipto ixtalac'himintacha. Chai anch tamacnulhch ju xalacat'un Israel junta ixtalhich'apatach ju ix'apapanatni.

